



Inatsisartunut ilaasortaq Malik Berthelsen, Siumut
MAANI

**London Mining-ip Isukasiani aatsitassarsiorinissamik qinnuteqaateqarneranut
atatillugu erngup nukinganut tunngatillugu § 37 naapertorlugu apeqummut nr.
2012-291-imut akissuteqaat**

27. december 2012
Sagsnr. 2012-060449.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

Inatsisartut suleriaasianni § 37 imm. 1 naapertorlugu erngup nukinganik
innaallagissiorfimmum tunngatillugu Naalakkersuisunut matuma kingulianiitunik
apeqquteqarputit.

**1. Isukasiani London Mining-ip (LM) atugassaanik Imarsuup Tasia atorlugu
erngup nukinganik innaallagissiorfiliortoqassappat qanoq
akeqarsinnaanissaa Naalakkersuisut ilisimasaqarfigivaat?**

Akissuteqaat:

Imarsuup Tasianni imermik periarfissaasut Alcoa-p aluminiuliorfimmik
suliaqarsinnaaneranut inniminnigaapput, taamaattumik Imarsuup Tasia maannakkut
LM-mut periarfissaqarfiutinneqarani.

VVM-mut nalunaarusiamut; *Engup nukinganik inerisaanissamut periarfissanut
piareersaataasumik misissuinerit*, tapiliusseq 9-mi erngup nukinga atorlugu
aaqqiissutissamut tassunga, nalunaarusiami aaqqiissutissaq Imarsuup-mik
taagorneqartumut, sanaartornissamut aningaasartuutaasussatut
naatsorsuutigineqartunik LM naatsorsuivoq.

Nalunaarusiami aaqqiissutissamut Imarsuup-mut ataatsimut katillugit
sanaartornissamut aningaasartuutissatut naatsorsuutigineqartut USD 677,3
millioniussasut oqaatigineqarpoq, taakkualu DKK 3,9 milliardinik naleqarput (USD-ip
nalinga 5,7-iutillugu). Nalunaarusiaq tusarniaanermut najoqqutassat ilaattut
ilaatinneqarpoq.

Tamatuma saniatigut Kalaallit Nunaanni maannamut erngup nukinganik
innaallagissiorfiornermut tunngatillugu paasisutissat misilittakkanik tunngaveqartut
Ineqarnermut, Attaveqarnermut Angallannermullu Naalakkersuisoqarfimmi (IAAN) Silap
pissusaanut Nukissiuuteqarnermullu allaffimmeersut Naalakkersuisut pissarsiaarat.
Paasisutissani taakkunani takuneqarsinnaavoq sanaartornermut aningaasartuutit MV-
mut ataatsimut agguaqatigiissillugu DKK 35 millioninik annertussuseqartut. Taakkua
Narsami/Qaqortumi, Nuummi, Sisimiuni aamma Ilulissani erngup nukinganik
innaallagissiorfiornermut sisamanut anginerpaanut sanaartornermut
aningaasartuutiviusunik (2012-imi akinut naatsorsorlugit) tunngaveqarput.

Aaqqiissutissaq Imarsuup-mi erngup nukinganik innaallagissiorfiliassaq 120 MW-inik
innaallagissiorinissamut ikkussuiffigineqassasoq naatsorsuutigineqarpoq. Tamatuma
paasisutissat misilittakkanik tunngaveqartut aallaavigalugit ataatsimut katillugit DKK 4,2

milliardinik sanaartornermut aningaasartuuteqarfiussasoq paasinarsisissinnaavaa, taakkualu LM-ip naatsorsugaannit DKK 300 millioninik qaffasinnerupput.

Imarsuup Tasiata saniatigut LM-ip aamma tasemit Tasersuarmit imermik periarfissaqarfiusunik atuinissamut periarfissat misissorsimavai. VVM-imut nalunaarusiamut tapiliussaq 9-imi LM-ip taamatutaaq erngup nukinganik aaqqiissutissamut tassunga, nalunaarusiami aaqqiissutissaq Tasersuaq-mik taagorneqartumut (periarfissaq A aamma B), sanaartornissamut aningaasartuutaasussat naatsorsorpai.

Aaqqiissutissaq Tasersuaq-mut ataatsimut katillugit sanaartornissamut aningaasartuutaasussat naatsorsuutigineqartunut LM-ip naatsorsugai aallaavigalugit allassimavoq taakkua periarfissaq A-mut USD 936,6 millioniussasut (DKK 5,34 mia.) aammalu periarfissaq B-mut USD 1459,4 millioniussasut (DKK 8,32 mia.) naatsorsuutigineqartoq. Periarfissat marluusut tamarmik 80 MW-inik innaallagissiorsinnaangorlugit ikkussuiffigineqassasut naatsorsuutigineqarpoq, kisiannili periarfissani ataasiinnaap atorineqarissaa taamaallaat ajornartussaangilaq. Taamaalilluni suliasami innaallagissamik tamakkiisumik pisariaqartitsineq 125 MW-nik annertussuseqartoq matussusersinnaajumallugu aaqqiissutissaq Tasersuaq dieselimik atuilluni nukissiamik annertooujussuarmik tapertaqartinneqartussaassaaq. Generatorinik dieselitortunik tapertaasussanik sanaartornermut aningaasartuutaasussat matuma siuliani allassimasuni ilaatinneqarput. Tamatuma saniatigut apeqqut 3-imut akissuteqaat innersuussuutigineqarsinnaavoq.

Oqaatigineqassaaq naatsorsuinerit tamarmik annertuumik nalorninartortaqaarmata, pissutigalugu suliasaq aallartilaaginnarluni killiffeqarmat. LM-ip nammineerluni naatsorsuinerminnut nalorninartortaasut +/- 50 %-inut taggippai.

2. Oliep akia eqqarsaatigalugu innaallagissiorfiup diesel-itortup ingerlanneqarneranut aningaasartuutigisassai tunngavigalugit erngup nukinganik innaallagissiorfiliornissaq diesel-itortumiit akikinnerussangila? Innaallagissiorfik diesel-itortoq erngup nukinganik innaallagissorfissamiit Naalakkersuisunit akikinnerusutut nalilerneqassappat, ataani allassimasut itisileqqussavakka:

- a. Olie qanoq annertutigisoq ukiumut atorineqartarniarpa?
- b. Olie suminngaanniit pisiarineqartarniarpa?
- c. Olie liiterimut qanoq akeqartussatut naatsorsuutigineqarpa?

Akissuteqaat:

VVM-mut nalunaarusiamut; *Engup nukinganik inerisaanissamut periarfissanut piareersaataasumik misissuinerit*, tapiliussaq 9-mi kapitali 4.4-imi aamma 5.0-imi erngup nukinganik atuinissamik piviusunngortitsinissamut periarfissat misissoqqissaarneqarput. Aningaasaqarnikkut misissueqqissaarnermi takuneqarsinnaavoq dieselitortumik innaallagissamik pilersuinerimut taarsiullugu, erngup nukinganik innaallagissamik pilersuinerimik pilersitsinerimik ingerlatsinerimut aningaasartuutinut sipaarutissat USD 160 millioniusut, erngup nukinganik innaallagissiorfiliornermi pisariaqartumik USD 892 millioninik suli allanik aningaasaliinissaq nallersuussinnaanngitsoq. Taamaalilluni erngup nukinga atorlugu innaallagissamik pilersuineq ilanngaaseereerluni maannakkut naliusumi (NPV) sunnuteqarnerluttussaavoq.

a)

VVM naapertorlugu LM-ip ukiumut 210 mio. literinik ikummatissamik atuinissaq naatsorsuutigaa, taakkunanga 78 % innaallagissiornermut atorineqartussaalluni. Taamaalilluni innaallagissiorfiit dieselitortut ukiumut 164 mio. literinik ikummatissamik atuisartussaapput.

b)

Aatsitassarsiormik suliassani Polaroil aqutigalugu ikummatissamik pisisarnissaq pisussaaffiliissutigineqanngilaq, taamaattumik LM pilersuisut allat aqutigalugit ikummatissamik pisinissamik periarfissaqarpoq. Taamaattorli LM-ip Aatsitassanut ikummatissanullu inatsimmi § 18, imm. 2 malittussaavaa, tassani allassimalluni pilersuineri suliffeqarfiit kalaallinit pigineqartut teknikkikkut niuernermillu tunngaveqartumik ingerlatsinikkut unammillersinnaassuseqarsimappata, taakkua atorineqassasut.

c)

LM-ip naatsorsuineri ikummatissap literimut akia USD 0,91 (2011-imi akiusut) aallaavigalugu suliarineqarput.

3. Nuummi Iisimatusarfimmi innuttaasunik ataatsimiisitsinermi 7. september 2012, LM-ip oqariartuutigivaa erngup nukinganik innaallagissorfiortoqassappat tamanna 3,7 mia. kr.-nit 8,3 mia. kr.-nillu akornanni akeqassasoq, aammalu sarfap pisariaqartinneqartup 50-70%-ia taamaallaat pilersissinnaammagu sananissaq akisuullaartoq piviusorsioruunngitsorlu. Taamatut LM-ip oqariartuuteqarnera upernarsiniarlugu Naalackersuisut qanormita iliuuseqarsimappat?

Akissuteqaat:

VVM-imi LM allappoq aaqqiissutissaq Imarssuaq suliassami nukissiamik pisariaqartitsinerup 125 MW-iusup 96 %-ianik matussusiisnaasoq. Tamatuma saniatigut erngup nukinganik innaallagissiorfimmut tasemit Tasersuarmit imermik periarfissanik atuisussamut sanaartornermut aningaasartuutaasussatut naatsorsuutigineqartut LM-ip naatsorsuiffigai. VVM-imi LM allappoq aaqqiissutissaq Tasersuaq suliassami ataatsimut katillugu nukissiamik pisariaqartitsinerup 125 MW-iusup 64 %-ianik matussusiisnaasoq.

Ingerlatsinerup isiginiarneqarnera aallaavigalugu aaqqiissutissani marluusuni tamaginni, suliassami tamakkiisumik nukissiamik pisariaqartitsineq matussusersinnaajumallugu kiisalu sillimmateqarnissaq aammalu ajornartoornermi pilersuinissaq eqqarsaatigalugu, annertunerusumik annikinnerusumillunniit generatorinik dieselitortunik tapertaqartitsisoqartussaavoq.

LM-ip pingaartumik aaqqiissutissaq Imarssuaq aallussimavaa, pissutigalugu taanna sumiiffimmi ingerlatseqatigiiffiup nukissiamik pisariaqartitsineranik naammassinninnissaq eqqarsaatigalugu aaqqiissutissaammatt immiut akilersinnaanerpaajusoq. Kisiannili aaqqiissutissaq Imarssuaq Alcoa-p aluminiuliorfissamut suliassanut inniminnigaavoq, taamaalillunilu pissusiviusuni atorineqarsinnaanani.

Tamatuma saniatigut apeqqutinut 1-imut aamma 2-imut akissuteqaatit innersuussutigineqarput.

4. Nunatta nammineq pigisaminik imaluunniit piginneqateqarluni erngup nukinganik pilersinneqartumik sarfamik Alcoa-mut London Mining-imullu tunisassiornissaq aningaasarsiorfiulluarsinnaasutut Naalackersuisut isumaqarfigivaat?

Nunatta erngup nukinganik innaallagissiorfinnut piginnittuusinnaanera piginneqataasinnaaneraluunniit immiut akilersinnaanngitsutut

**nalilernerqarpat imminut akilersinnaannginermik naatsorsuutit
nassuiarneqarnissaat immikkut qinnutigissavara.**

Akissuteqaat:

Alcoa-mik aamma LM-imik pilersuinissamut erngup nukinganik innaallagissiorfinnut sanaartornermut aningaasartuutit DKK 10 milliardit sinnissagaat ilimanaateqarluinnarpoq. Sanaartornissamut aningaasaliinerinnaat annertussusaasa ingerlatseqatigiiffiup Namminersorlutik Oqatussanik pigineqartup aningaasaliinissaata annaasaqaataanissaa ilimanaateqarluinnalersippaat.

2012-imi upernaakkut ataatsimiinnermi oqaluuserisassami 113-imi aluminiuliorfimmik suliaqartoqalissagaluarpas piginnittuunnginnissaq Inatsisartut aalajangiuppaat. Inatsisartuni ilaasortat arlaannaalluunniit aalajangiinnermut tassunga akerliunngillat. Taamaalilluni Inatsisartut Inuussutissarsiornermut Ataatsimiititaliaa oqaluuserisassami taaneqartumi isumaliutissiisummini allappoq: *"Killilimmik piginneqataanikkut nunatta karsiata peqataanissamut pisussaaffilerneqarnissaanut aningaasatigut atugassiissutissat pisariaqartut pigineqanngitsut ataatsimiititaliaq isumaqarpoq."*

Ingerlatseqatigiiffiit namminersortunit pigineqartut taamaattut piunissaannut tunngaviusut nunarsuarmi tamarmi niuernerup kimeqarneranit aquneqartut ukiorparujussuarni ingerlanneqarnissaat qularnaveeqquteqartinneqanngippat, ingerlatseqatigiiffiup Namminersorlutik Oqatussanik pigineqartup akilersornissaanut periarfissaqarani annertooujussuarmik aningaasaliisariaqalersinnaanera annertoujussuarmik piviusumillu aarlerinaateqarpoq. Taamaattoqassappat Namminersorlutik Oqatussat naggataatigullu Kalaallit Nunaanni innuttaasut akiligassamik taassuminnga akiliisussanngortussaapput.

Taamaattumik Naalakkersuisut naliliipput Alcoa-mut aamma LM-imut ingerlatseqatigiiffik Namminersorlutik Oqatussanik pigineqartoq aqqutigalugu innaallagissamik pilersuinissaq sutigulluunniit piviusumik periarfissatut isigineqarsinnaanngitsaq.

Inussiarnersumik inuulluaqqusillunga



Ove Karl Berthelsen



11. december 2012

Inatsisartut suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

- 1. Isukasiani London Mining-ip (LM) atugassaanik Imarsuup Tasia atorlugu erngup nukinganik innaallagissiorfiliortoqassappat qanoq akeqarsinnaanissaa Naalakkersuisut ilisimasaqarfigivaat?**
- 2. Oliep akia eqqarsaatigalugu innaallagissiorfiup diesel-itortup ingerlanneqarneranut aningaasartuutigisassai tunngavigalugit erngup nukinganik innaallagissiorfiornissaq diesel-itortumiit akikinnerussanngila? Innaallagissiorfik diesel-itortoq erngup nukinganik innaallagissiorfissamiit Naalakkersuisunit akikinnerusutut nalilerneqassappat, ataani allassimasut itisileqqussavakka:**
 - a. Olie qanoq annertutigisog ukiumut atorneqartarniarpa?**
 - b. Olie suminngaanniit pisiarineqartarniarpa?**
 - c. Olie liiterimut qanoq akeqartussatut naatsorsuutigineqarpa?**
- 3. Nuummi Ilisimatusarfimmi innuttaasunik ataatsimiisitsinermi 7. september 2012, LM-ip oqariartuutigivaa erngup nukinganik innaallagissiorfiliortoqassappat tamanna 3,7 mia. kr.-nit 8,3 mia. kr.-nillu akornanni akeqassasoq, aammalu sarfap pisariaqartinneqartup 50-70%-ia taamaallaat pilersissinnaammagu sananissaq akisuallaartoq piviusorsiortuunngitsorlu. Taamatut LM-ip oqariartuuteqarnera uppernarsiniarlugu Naalakkersuisut qanormita iliuuseqarsimappat?**
- 4. Nunatta nammineq pigisaminik imaluunniit piginneqateqarluni erngup nukinganik pilersinneqartumik sarfamik Alcoa-mut London Mining-imullu tunisassiornissaq aningaasarsiorfiulluarsinnaasutut Naalakkersuisut isumaqarfigivaat? Nunatta erngup nukinganik innaallagissiorfinnut piginnittuusinnaanera piginneqataasinnaaneraluunniit imminut akilersinnaanngitsutut nalilerneqarpat imminut akilersinnaannginermik naatsorsuutit nassuiarneqarnissaat immikkut qinnutigissavara.**

(Malik Berthelsen, Siumut)

Tunngavilersuut:

Erngup nukinganik innaallagissiorfissat sananaqarnerini aningaasartuutit annertuginarsinnaagaluartut isumaqarpunga aamma aningaasat qanoq amerlatigisut kaaviaartinneqarsinnaanerat eqqarsaatigineqartariaqartoq, ingammik aatsitassarsiorfit sarfamik qanoq annertutigisumik atuinissaat aammalu Alcoa ukiuni qanoq amerlatigisuni atasinnaanissaa eqqarsaatigalugu.